

Transkription von Urkunde HBS 1497b

Ort, Datierung: Halberstadt, 1497-01-11

Signatur: Stadtarchiv Halberstadt, E 33g

Inhalt: Rat der Stadt Halberstadt: Erbzins einer Mühle

WE Borgermeister Ratmann Innyngeſmeister vnde Burmeister der Stadt Halberſtat Bekennen In
duſſem vnſem opene breue vnde Reuereſale / vor vns vnde vnſe nakom(m)en vor alſzweme den duſſe
breff vorkomet den ſeyn horen adder leſen Dat de Erhafftige Er Nicolaus Wulff ittzu(n)t vicari(us) /
des Altars vnſer leue(n) fruwen In der Capellen(n) uppe deme Boſſleueſchen berge belegen In de
erſten vicarie der Kerkenn(e) Sunte Bonifacij bynne(n) der / Stadt Halberſtat horende mit ſunderlikem
Rade willen gunſt vnde fulborde der werdigen vnde erhafftigen Ern Nycolaufen Amelungeſ Dekens /
Senioris vnde deſ gantzen Capittels der kerken ſunte Bonifacij obgnant der gemelten vicarien lenhern
Deme vorſichtigen Hinrick ffrancken / vnde ſinen erue(n) De de Molne vnder dem Boſſleueſchen
berge ittzu(n)t genommet In vnde meth aller nuth vnde tobehorin(n)ge van dem(e) gn(an)t(en) Vicario deſ
/ Altars vnſer leue(n) fruwen ittzu(n)t ergemelt to rechtem erue tynsz gude bekant beſeten gebuket
genetet vnde fruchte dar van entfangen Ingenome(n) / vnde wente an duſſe tijdt Inne hat hefft vnde
tho eyne(m) Rechten Jerliken eruentynſze dar van eyne marck Halberſtedeſcher were vnde eyne
Scheppel / weiteſ deme obgnant(en) vicario alſe ſinem Rechten eruen tynszhern geuen entrichtet vnde
gulden hefft De ſulffte boue(n) gemelte Molne uth ſunderliken / merckliken bewechliken Untbarliken
vnde ſchynbarliken orſaken In deme houe(n)t breue vns dar ouer gegeuen vortalt hefft vor ſeck vnde
ſyne Na/komelinge In der obgnant(en) Vicarie Willen gunſt vnde fulbort gegeue(n) vns vorgna(n)t(e)
Borgermeiſter(e) Radt Innyngeſmeister vnde Burmeister , / der Stat to Halberſtat erfflick
touorkopende Doch alſo mit dem(e) vnderſchede Dat we obgn(an)t(e) Borgermeiſters vnde Radt to
Halberſtat Twene vnſes Radeſ / frunde dar tho benome(n) uthſetten vnde namhafftich erwellen vnde
de vor den Vicario adder ſinen Nakomelinge(n) perſonlick In vnde an ſtat deſ Con(n)u(n)s / der
gemeyne(n) ſtat In rechtliker geſatter tijdt vnde friſt alſe bynnen Jare vnde dage vngeferlick vorſtellen
ſchullen Den ſuluen twen ſchal vnde will de / gnante vicarius edder ſine nakomen wan vnde wu vaken
deſ van noden vnde in ſynen vall komen werdt De ogemelten Molne to Rechtem erue(n) tynſze / alſe
Recht vnde wontlick iſz ane alle behelpp wedderrede vnde argeliſt bekennen(e) vnde vor Rechte
eruetynsz me(n)ne annhemen vordedingen vnde holden De / denne wedder v(m)me vngeſumeth reydt
ouer deme gnant(en) vicario adder ſinen nakomen to gudem dancke nutte vnde frome(n) vor de
bekentniſſe vnde Recog/nitien eyne marck geldes vnde Jerlick upp Oſtern nu hyn vnde to ewigen
tijden eyne marck geldes alle halberſtedeſche weringe vnde eyne(n) Scheppel / weiteſ to eyne(m)
Rechten eruentynſze geuen vnde vngeuerlick dancknamich betalen entrichten(n) vnde vornoigen
ſchullen vnde ſo Idt Na geſchicke deſ Almech/tigen godeſ ſeck alſo begeuen worde Dat de twe
perſonen alſo vor eruetynszme(n)ne In vnde van(n) wegen(n) der Borgermeiſter Radeſ vnde der Stat
Halberſtadt / angenomen beyde dodeſzhaluen affgegan vnde vorſtorue(n) ſint vnde nicht ehr Denne
ſchullen vnde willen we Borgermeiſter Rat vnde Co(m)mun(e) an ſtat der / vorſtorue(n) tynszme(n)ne
Twene ander vnſes Radeſ frunde dar to beqweme vnde dogende wedder v(m)me In obgemelter
Rechtliker tijdt an tonheme(n)de vnde tho / bekennende vorbringen vnde preſentere(n) ane uthflucht
vnde argeliſt Den de velgnant(en) Vicarius adder ſine nakomelinge In der gemelten Vicarie beſitter /
vnde poſſeſſor De molne mit alle vnde iſzliker orer gerechticheit bekennen to lathen Vnde ane alle

geuerde annhemen vnde an der marck wu boue(n) gesat / vor de Recognitien vnde bekentnisse genoige hebben schall , doch des geborliken Jartinses vngeuen vnschedelick sin schall So auer we Borgermester / Radtman(ne) vnde Co(m)mun In sulker Rechtliker tijdt Na deme valle vnde vorscheyde , an stat der vorstoruene(n) tynszme(n)ne mit vorachtinge anderer tinsz/me(n)ne to bekennen laten vortobringende vns nicht Richten worden(n) Also denne schal de vicarius adder sine nakomen de Molne eyne(n) andern also vorlediget / tynszgut to bekennende Sesz weken vnde dre dage deme Rade to gude holden vnde dar mede stille stan wo we Borgermester vnde Ratma(n)ne des auer / vor achten worden vnde de nicht vorstellen angeue(n) vnde mit der volge vns to bekennende lathen vnse tinszpflicht vnde gebore also wontlick is to donde / boden vnde geuen also denne schal deme vicario adder sinen nakomen ane alle Rechtes forderinge vnde erkentnisse mit der dâth bouenbesty(m)mede tijdt / dage vnde ffrist fullenkomen vorschene(n) Sulke molne heymgefallen(en) de ane alle vorhinderinge Indracht erru(n)ge vnde wedderrede touorwende bekenne(n) / edder dar mydde na siner edder siner nakomelinge beqwemicheit mede to handelende vngeferlick tostan vnde beholden sin Dar upp hefft de obgna(n)te Hinrick / ffranck vor seck vnde sine elike husfruwen mit orem guden willen vnde alle sine erue(n) vnde erffnamen mydt hande vnde munde sodane obgamelte(n) Molen / vnder dem Bossleueschen berge belegen vor deme vakegnant(en) Vicario also sine(n) Rechten erfftinszher(e)n vorlaten vnde ewige aueticht dar van gedan Vnde / we Borgermeister vnde Rat to Halberstat hebben derwegen deme gna(n)t(en) Den Ersame(n) Tylen vam(e) hagen(e) Borgermeister vnde Martin loden to behoff / der Stat to Halberstat de Molne so to entfangende vorstellet vnde pu(n)teret Den de vorgemelte Vicarius vnser Stat Halberstat to gude sodane wy / berorde Molne mit alle orer tobehoringe vnde gerechticheit Also de Hinrick ffrancke gehat hefft to Rechteme erue(n)tinsze upp vorgeschreue formen / vnde wise bekant hefft vnde bekennet , In crafft vnde macht des breues vns van dem(e) sulfften vicario vnde Capittle siner lehn her(e)n dar ouer gegeuen(e) / Vnde vor alsodane bekentnisse vnde Recognitien hebben we Borgermeister vnde Radt to Halberstat deme gnant(en) Vicario eyne Halberstedesche marck / Halberstedescher were to guder genoige betalet vnde bereidet Vnschedelick eyner marck der suluen Halberstedeschen were vnde eynes Scheppel weytes / upp de hilligen Ostern to eruen tynsze deme sulfften Vicario vnde sinen Nakomelingen(n) so ock bouen berort ane weygery(n)ge effte Jennygerleie Insage / to betalende Des to bekentnisse vnde openbarer orkunde hebben we Borgermeister Ratma(n)ne In(n)y(n)geszmers vnde Burmesters der Stat Halberstat / obgnant vor vns vnde vnse nakomen(n) Dussen vnser breff vnde Reuersall mit vnser Stat Groten angehangen(n)dem Ingesegele witliken vorsegelt / Gegeuen Na der gebort Cristi vnser heren Dusentveyrhundert dar Na In deme Seuenvnde Negentigesten Jare Am(e) dinstaghe Na Epiphanie d(o)m(ini)